



Universitätsbibliothek Paderborn

**Disputationes|| ROBERTI BELLAR-||MINI E SOCIATE
IESV,|| DE CONTROVERSIIS CHRISTIANAE|| FIDEI,
ADVERSVS HVIVS TEM-||poris Hæreticos,||**

Tribus Tomis comprehensæ.||

DE CONCILIIS, ET|| ECCLESIA MILITANTE,|| QVATVOR LIRBRIS||
COMPREHENSA.||

Bellarmino, Roberto Francesco Romolo <Heiliger>

Ingolstadii, [1599]

VD16 B 1607

V. De Schismaticis.

[urn:nbn:de:hbz:466:1-53873](https://nbn-resolving.de/urn:nbn:de:hbz:466:1-53873)

litia, qui transfugit ad castra hostium, vi cogere ad suacula, aut etiam suspendere. Apostolus autem loquitur de iis, qui ita foris sunt, ut nunquam fuerint intus.

Ad illud de charactere dico, haereticos retinere extra Ecclesiam characteres illos indebiles, sicut retinent oves perdite characterem inustum in dorso, & desertores militiae signa militaria: sed non propterea sunt de Ecclesia, quia non sufficiunt characteres illi ad constituendum aliquem in Ecclesia; alioqui etiam in inferno esset Ecclesia. Et tamē S. Thomas 3. part. quæst. 8. art. 3. dicit, damnatos nec actu, nec potestate esse membra Christi. Præterea, nō propriè vnit character hominem cum capite, sed est signum potestatis & unionis cuiusdam, & ideo in inferno, illo signo cognoscentur, qui fuerunt membra Christi. Quod autem non vniat, patet; nam non vnit exterius, cùm sit res inuisibilis: nec interius, cùm non sit actus, nec habitus operatiuus. Vnde S. Thomas primam unionem internam ponit in fide.

CAPVT V.

De Schismaticis.

DE SCHISMATICIS nonnulli Catholicorum dubitant, an sint de Ecclesia; immò esse eos de Ecclesia affirmat Alphonsus de Castro loco notato. Sed facile est contrarium ex sacris literis, & Patri traditione docere. Nam in primis cùm dicitur Luc. 5. scindebatur autem rete, per scissionem retis, & egressionem piscium ex reti, intelliguntur schismata Ecclesia, & egressio haereticorum & schismaticorum de Ecclesia, ut exponit Augustinus tract. 122. in Ioannem.

Præterea Scriptura vocat Ecclesiam: Vnum ouile, Ioan. 10. Vnum corpus, Rom. 12. Vnam sponsam, Vnam amicam, Vnam columbam, Cant. 6. Schisma autem scindit id, quod erat vnu, in partes, ut patet ex ipso nomine. Nam κίσις, scindere est, & γόρη, scissura: ergo schismatici non sunt in Ecclesia, nec de Ecclesia, nam pars scissa à corpore, non est amplius pars eius corporis. Vnde pulchrè Cyprianus libro de unitate Ecclesiæ dicit, Ecclesiam significari per vestem Christi inconsuitem,

eilem, quæ scissa non fuit, ut intelligeremus Ecclesiam scindi posse, sed non eo modo, quo sciaduntur vestes, ita ut omnes partes æquè maneant partes vestis: sed quomodo scinditur ramus ab arbore, qui statim moritur, arbore viuente; & riuus à fonte, qui mox arescit, fonte fluente; & radius à sole, qui continuò deficit, sole, ut erat, permanente. Vel si contendas, partem scissam ab Ecclesia, esse etiam Ecclesiam quādam, multas Ecclesiæ facies, quod est contra Scripturas: paulò antè notatas.

Probatur SECUNDUM ex decretis Pelagij Papæ, qui ex professo probat, schismaticos non esse de Ecclesia, 24. q. I. can. Pudenda, & can. Schisma. Accedit etiam testimonium totius Ecclesiæ, quæ in Paræcœu orat pro hæreticis & schismaticis, ut eos Deus ad Ecclesiam Catholicam reuocare dignetur. Quod certè non faceret, si eos in Ecclesia esse crederet. Huc etiam pertinet testimonium Catechismi Romani, cuius non est exigua auctoritas in Ecclesia Dei. Disertis autem verbis Catechismus prædictus in explicatione Symboli Apostolici, schismaticos ab Ecclesia separat.

Probatur TERTIO ex Patribus. IRBNAEVUS lib. 4. cap. 62. posteaquam dixerat in superioribus capitibus, virum spiritualem iudicare omnes hæreticos & schismaticos, & enumerauerat in particulari multis hæreses, & subiunxerat de schismate propriè dicto, concludit in summa: *Iudicabit, inquit, omnes eos, qui sunt extra Veritatem, id est, extra Ecclesiam.* S. CYPRIANVS lib. 4. epist. 9. ad Florentium Papianum: *Ecclesia, inquit, est plebs sacerdoti adunata, & pastoræ suæ gressus adhaerens.* Endo scire debes, Episcopum in Ecclesia esse, & Ecclesiam in Episcopo, & si qui cum Episcopo non sint, in Ecclesia non esse, &c. At certè schismatici cum Episcopo non sunt, igitur nec in Ecclesia sunt.

CHRYSOSTOMVS homil. 3. in epistolam primam ad Corinthios: *Schismatis, inquit, significantia satis eos arguit,* vel potius satis est eius appellatio, qua vehementer eos tangat. Non enim plures integræ partes factæ sunt, una perit. Si quidem integris Ecclesiæ multis eas constituerent. Et homil. 11. in epistolam ad Ephesios docet, schismaticos similes esse manu à corpore præcisæ, quæ mox desinit esse membrum; & ibidem dicit, schismaticos in altera esse Ecclesia,

licer

licet in fide & dogmatibus cum vera Christi Ecclesia consentiant.

HIERONYMVS in caput primum Amos: *Schismati*, inquit, *separant quidem deceptam multitudinem ab Ecclesia Dei*; tamen hoc non faciunt crudelitate, qua heretici, etc. Et in cap. 3. ad Titum: *Inter heresim*, inquit, *& schisma hu* *interesse arbitramur, quod heresis peruersum dogma hab* *at: schisma propter Episcopalem dissensionem ab Ecclesia pa* *riter separat. Vbi nota illud; Pariter. AVGUSTINVS libto* de fide & Symbolo, cap. 10. *Credimus*, inquit, *& sanctam Ec* *clesiam, & iisque Catholicam; nam & heretici, & schismati* *congregationes suas Ecclesias vocant: sed heretici de Deo fa* *sa sentiendo ipsam fidem violent, schismatici autem discessio* *nibus inquis à fraterna caritate disiliunt, quamvis excri* *dant, qua credimus. Quapropter nec hereticus pertinet ad* Ecclesiam Catholicam, quoniam diligit Deum, nec schismati^{cus}, quoniam diligit proximum.

OPTATVS lib. 1. contra Parmenianum, deschismaticis loquens: *Deserta*, inquit, *matre Catholica, impij filij dum fi* *ras excurrunt, & se separant, & eos fecisti, à radice matris* Ecclesia inuidia falcibus amputati, errando rebelles abscedunt. Et lib. 2. comparat schismaticos cum ramis, riuulis, & ratis praecisis ab arbore, fonte, sole. FVLGENTIVS de fide alle- trū, c. 38. & 39. *Firmissime tene*, inquit, *& nullatenus dubitet,* non solum Paganos, sed etiam Iudeos, hereticos, & schismati^ccos, qui extra Ecclesiam Catholicam, presentem finiunt vitam, in ignem aeternum uturos. Denique idem habent THOMAS VValdensis tomo 1. lib. 2. cap. 9. doctrinalis fidei antiquæ; Io- annes D RIE D O lib. 4. de Scripturis & dogmatibus Ecclesiasticis, cap. 2. part. 2. & alij ex recentioribus.

Probatur VLTIMO ratione; nam de ratione Ecclesia est, ut sit una vniione membrorum inter se, & cum suo capite; hanc autem vunionem schismaticus tollit, dum se à communione capit, & aliorum membrorum separat. Quod autem unitas essentialis Ecclesiæ consistat in illa coniunctione membrorum inter se, & cum capite, probatur; nam multiplex unitas inuenitur in Ecclesia. PRIMA est unitas ratione eiusdem principij, id est, Dei vocantis, Ioan. 6. Nemo venit ad me, &c. SECUND A unitas ratione eiusdem ultimi finis,

finis, quod significatum est Matth. 20. in illo uno denario omnibus operantibus promisso. TERTIA est ratione eorumdem mediorum, id est, Fidei, Sacramentorum, Legum, iuxta illud Ephes. 4. *Vna Fides, unum Baptisma.* QVARTA est ratione eiusdem Spiritus sancti, à quo tanquam externo & separato Rectore vniuersa Ecclesia gubernatur, 1. Corinth. 12. *Divisiones gratiarum sunt, idem autem Spiritus.* QVINTA est ratione eiusdem capituli, tanquam interni & coniuncti Rectoris; omnis enim Ecclesia eidem Christo, & eius Vicario tanquam capiti paret, Ephes. primo: *Ipsum dedit caput super omnem Ecclesiam.* Et Ioannis ultimo: *Simon Petre, pascere oves meas.* SEXTA est ratione connexionis membrorum inter se, & præcipue cum capite, ut est principale membra, Roman. 12. *Vnum corpus sumus, alter alterius membra.*

Iam vero inter has unitates, illæ, quæ faciunt propriè Ecclesiam vnam, sunt duæ ultimæ. nam per Primam, Ecclesia non tam est vna, quam ex uno. Per Secundam, non tam est vna, quam ad vnum. Per Tertiam, non tam est vna, quam per vnum. Per Quartam, non tam est vna, quam sub uno. Per Quintam & Sextam, propriè est vna, id est, vnum corpus, unus populus, vna societas. SCHISMA autem opponitur his unitatibus postremis; tunc enim est schisma, quod vnum membrum non vult amplius esse membrum illius corporis, nec sub illo capite; quare tollit unitatem essentialem, atque Ecclesiam ipsam: *Schismaticus igitur non est de Ecclesia.*

At obiciunt PRIMO. Ecclesia est Catholicorum congregatio, ut Papa Nicolaus definit de consecrat. distinct. prima, cano. Ecclesia: At schismatici sunt Catholici, igitur sunt de Ecclesia. RESPONDEO primò, schismaticos et si fidem Catholicam habeant, tamen non propriè dici Catholicos, nisi eam fidem in Ecclesia Catholica profiteantur, ut pater Augustino & Optato locis notatis. Secundò dico, non esse plenam definitionem Nicolai Papæ: *neque eum voluisse definire Ecclesiam, sed tantum excludere hæreticos ab Ecclesia.* Sicut etiam Innocentius fecit, cùm ait, Ecclesiam esse fidelium congregationem, cap. Firmiter, de summa Trinitate & fide Catholicæ.

SECVN-

» SECUND O obiciunt. Schismatici et si nolint subesse P o-
 » tifici , tamen volunt subesse Christo summo capiti ; & licet
 » nolint communicare huic Ecclesiae, quæ est in terris, tamen
 » volunt communicare Ecclesiae, quæ est in cœlis, quæ est me-
 » lior pars Ecclesiae; non igitur tollunt Ecclesiae unitatem, nec
 » sunt absolute extra Ecclesiam. Et confirmatur argumentum
 » à simili. Nam si quis non vellet esse sub Episcopo suo parti-
 » culari, nec communicare cum Ecclesia particulari, quæ sub
 » illo Episcopo est, & tamē vellet esse sub Romano Pontifice,
 » & communicare cum Ecclesia vniuersali , is non posset dic-
 » esse extra Ecclesiam.

RESPONDEO , nemine posse, etiam si velit, subesse Christo , & communicate cum Ecclesia cœlesti , qui non subest Pontifici , & non communicat cum Ecclesia militate . Christus enim ait: *Qui vos audit, me audit, Luc. 10.* Et præterea, Christus est summum caput , quoad influxum interiorem ipse enim influit in sua membra sensum & motum, id est, fidem & caritatem : ita Papa in Ecclesia militante est summum caput , quoad influxum exteriorem doctrinæ fidei & Sacra-
mentorum. Ecclesia quoq; triumphans unita est , immo-
tius vna cum militante, & proinde nemo potest velle separari ab vna, quin separetur ab altera.

Ad confirmationem similiter respondeo , eum, qui sepa-
rat se ab Ecclesia & Episcopo particulari, necessariò separati
ab Ecclesia & Episcopo vniuersali; nisi forte ideo se aliquis
separat ab Ecclesia & Episcopo particulari, quod illa Eccle-
sia & ille Episcopus hæretici aut schismatici sint. Rectè enim
CYPRIANVS lib. 4. epist. 9. *Frustrà, inquit, sibi blandiun-
tur q̄, qui pacem cum Sacerdotibus Dei non habentes obre-
punt, et latenter apud quosdam communicare se credunt, cum
Ecclesia, qua Catholica vna est, scissa non sit, neque diuisi-
ta sed sit sibi connexa, & coherentium sibi inut-
cem Sacerdotum glutino
copulata.*

